

АКАФИСТ СВЯТИТЕЛЮ НИКОЛАЮ ЧУДОТВОРЦУ

Кондак 1

Возбранный Чудотворче и изрядный угодниче Христов, миру всему источаяй многоценное милости миро и неисчерпаемое чудес море, восхваляю тя любовию, святителю Николае: ты же, яко имеяй дерзновение ко Господу, от всяких мя бед свободи, да зову ти:
Радуйся, Николае, великий Чудотворче.

Икос 1

Ангела образом, земнаго суща естеством яви тебе всея твари Создатель; благоплодную бо доброту души твоей провидев, преблаженне Николае, научи всех вопити тебе сице:
Радуйся, от утробы матери очищенный;
радуйся, даже до конца освященный.
Радуйся, рождением своим родителей удививый;
радуйся, силу душевную абие по рождестве явивый.
Радуйся, саде земли обетования;
радуйся, цвете Божественного саждения.
Радуйся, лозо добродетельная винограда Христова;
радуйся, древо чудоточное рая Иисусова.
Радуйся, крине райского прозябения;
радуйся, миро Христова благоухания.
Радуйся, яко тобою отгонится рыданье;
радуйся, яко тобою приносится радование.
Радуйся, Николае, великий Чудотворче.

Кондак 2

Видяще твоих мир излияние, богомудре, просвещаемся душами и телесы, дивна тя мироточца живоносна, Николае, разумеюще: чудесы бо яко водами, благодатию Божию изливающимися, напаеши верно вопиющих к Богу: Аллилуйя.

Икос 2

Разум неуразуменный вразумляя о Святей Троице, был еси в Никеи со святыми отцы поборник исповедания Православныя веры: равна бо Отцу Сына исповедал еси, соприсносущна и сопрестольна, Ария же безумнаго обличил еси. Сего ради верни научишася воспевати тебе:
Радуйся, великий благочестия столпе;
радуйся, верных прибежища граде.
Радуйся, твердое Православия укрепление;
радуйся, честное Пресвятыя Троицы носило и похваление.
Радуйся, Отцу равночестна Сына проповедавый;
радуйся, Ария возбесившагося от Собора святых отгнавый.
Радуйся, отче, отцев славная красота;
радуйся, всех богомудрых премудрая доброта.
Радуйся, огненная словеса испущаяй;
радуйся, добре стадо свое наставляй.
Радуйся, яко тобою вера утверждается;
радуйся, яко тобою ересь низлагается.

Радуйся, Николае, великий Чудотворче.

Кондак 3

Силою, данною ти свыше, слезу всяку отъял еси от лица лютे страждущих, богоносе отче Николае: алчущим бо явился еси кормитель, в пучине морстей сущим изрядный правитель, недугующим исцеление и всем всяк помощник показался еси, вопиющим Богу: Аллилуия.

Икос 3

Имеяше воистинну, отче Николае, с небесе песнь тебе воспеваема быти, а не от земли: како бо кто от человек возможет твоя святыни величия проповедати? Но мы, любовию твою побеждаем, вопием ти сице:

Радуйся, образе агнцев и пастырей;

радуйся, святое очистилище нравов.

Радуйся, добродетелей великих вместилище;

радуйся, святыни чистое и честное жилище.

Радуйся, светильниче всесветлый и вселюбимый;

радуйся, свете златозарный и непорочный.

Радуйся, достойный Ангелов собеседниче;

радуйся, добрый человеков наставниче.

Радуйся, правило веры благочестивыя;

радуйся, образе кротости духовныя.

Радуйся, яко тобою от страстей телесных избавляемся;

радуйся, яко тобою сладостей духовных исполняемся.

Радуйся, Николае, великий Чудотворче.

Кондак 4

Буря недоумения смущает ми ум, како достойно есть пети чудеса твоя, блаженне Николае; никто же бо может я исчести, аще бы и многи языки имел и глаголати восхотел; но мы дивно Богу, в тебе прославляющемся, дерзаем воспевати: Аллилуия.

Икос 4

Слышаша, богомудре Николае, ближний и дальний величие чудес твоих, яко по воздуху легкими благодатными крылами навыкл еси сущих в бедах предваряти, скоро от тех избавляя всех, вопиющих к тебе таковая:

Радуйся, избавление от печали;

радуйся, подаяние благодати.

Радуйся, нечаемых зол прогонителю;

радуйся, желаемых благих насадителю.

Радуйся, скорый утешителю в беде сущих;

радуйся, страшный наказателю обидящих.

Радуйся, чудес пучино, Богом излиянная;

радуйся, закона Христова скрижали Богом писаныя.

Радуйся, крепкое падающих возведение;

радуйся, право стоящих утверждение.

Радуйся, яко тобою всякая лесть обнажается;

радуйся, яко тобою всякая истина сбывается.

Радуйся, Николае, великий Чудотворче.

Кондак 5

Боготечная звезда явился еси, наставляя по морю плавающих люте, имже смерть предстояше вскоре иногда, аще не бы ты предстал еси призывающим тя в помощь, Чудотворче святый Николае; уже бо нестыдно бесом летающим и погрузити корабли хотящим запретив, отгнал еси их, верныя же научил еси спасающему тобою Богу взывать: Аллилуйя.

Икос 5

Видеша отроковицы, на брак скверный нищеты ради уготованныя, великое твое к нищим милосердие, преблаженне отче Николае, егда старцу родителю их ношию узельцы три зата таяся подал еси, самаго со дщерьми избавляя от падения греховнаго. Того ради слышиши от всех сице:

Радуйся, милости превеликия сокровище;
радуйся, промышления о людех приятелище.
Радуйся, пище и отрадо к тебе прибегающих;
радуйся, хлебе неснедаемый алчущих.
Радуйся, богатство, бедне живущим на земли Богом данное;
радуйся, воззвижение скорое убогих.
Радуйся, быстрое нищих услышание;
радуйся, скорбящих приятное попечение.
Радуйся, триех дев непорочный невестителю;
радуйся, чистоты усердный хранителю.
Радуйся, ненадежных надеяние; радуйся, всего мира наслаждение.
Радуйся, Николае, великий Чудотворче.

Кондак 6

Проповедует мир весь тебе, преблаженне Николае, скораго в бедах заступника, яко многажды во едином часе по земли путешествующим и по морю плавающим, предваряя, пособствуяши, купно всех от злых сохраняя, вопиющих к Богу: Аллилуйя.

Икос 6

Возсиял еси свет животный, избавление нося воеводам, неправедную смерть прияти имущим, тебе, добрый пастырю Николае, призывающим, егда вскоре явлься во сне цареви, устрашил еси его, сих же неврежденных отпустити повелел еси. Сего ради с ними купно и мы благодарственно вопием ти:

Радуйся, усердно призывающим тя помогай;
радуйся, от неправеднаго убиения избавляй.
Радуйся, от лестныя сохраняя клеветы;
радуйся, неправедныя разрушаяй советы.
Радуйся, растерзаяй лжу яко паучину;
радуйся, возношаяй славно истину.
Радуйся, неповинных от уз разрешение;
радуйся, и мертвцев оживление.
Радуйся, проявителю правды;
радуйся, помрачителю неправды.

Радуйся, яко тобою неповинни избавлени от меча;
радуйся, яко тобою насладиша света.
Радуйся, Николае, великий Чудотворче.

Кондак 7

Хотя богохульное еретическое отгнati злосмрадие, миро воистинну благованное, таинственное явился еси, Николае: люди мирайския упасл еси и весь мир своим благодатным миром исполнил еси. И от нас убо богомерзкое греховное злосмрадие отжени, да благоприятно Богу вопием: Аллилуия.

Икос 7

Нового тя Ноя, наставника ковчега спасительного разумеем, отче святый Николае, бурю всех лютых разгоняющаго направлением своим, тишину же Божественную приносящаго вопиющим таковая:

Радуйся, обуреваемых тихое пристанище;
радуйся, утопающих известное хранилище.
Радуйся, плавающих посреде пучин добрый кормчий;
радуйся, треволнения морская устанавливающий.
Радуйся, превождение сущих в вихревах;
радуйся, согреяние сущих во мразех.
Радуйся, сияние, скорбный мрак разгоняющее;
радуйся, светило, вся концы земли просвещающее.
Радуйся, от бездны греховныя люди избавляяй;
радуйся, в бездну адскую сатану ввергаяй.
Радуйся, яко тобою дерзновенно бездну милосердия Божия призываем;
радуйся, яко тобою от потопа гнева избавльшеся, мир с Богом обретаем.
Радуйся, Николае, великий Чудотворче.

Кондак 8

Странное чудо является притекающим к тебе, блаженне Николае, священная твоя церковь: в ней бо и малое моление приносяще, великих недугов приемлем исцеление, аще токмо по Бозе упование на тя возложим, верно вопиюще: Аллилуия.

Икос 8

Весь еси всем воистинну помощник, богоносе Николае, и собрал еси вкупе вся прибегающая к тебе, яко свободитель, питатель и врач скорый всем земным, на похвалу всех воздвизая вопити к тебе сице:

Радуйся, всяких исцелений источниче;
радуйся, люте страждущим помощниче.
Радуйся, заре, сияющая в нощи греховней блуждающим;
радуйся, росо неботочная в знои трудов сущим.
Радуйся, подаваяй требующим благостроение;
радуйся, уготовляяй просящим изобилие.
Радуйся, многажды прошение предваряяй;
радуйся, старым сединам силу обновляяй.
Радуйся, многих заблуждших от пути истинного обличителю;
радуйся, таин Божиих верный служителю.

Радуйся, яко тобою зависть попираем;
радуйся, яко тобою благонравное житие исправляем.
Радуйся, Николае, великий Чудотворче.

Кондак 9

Всякия утоли болезни, великий наш заступниче Николае, растворяя благодатная врачевания,
услаждающая души наша, сердца же веселящая всех усердно к помощи твоей притекающих,
Богу же вопиющих: Аллилуия.

Икос 9

Ветия суемудренныя нечестивых видим тобою посрамленныя, богомудре отче Николае: Ариа
бо хульника, разделяюща Божество, и Савеллия, смешающа Святую Троицу, препрел, нас же во
Православии укрепил еси. Сего ради вопием ти сице:
Радуйся, щите, защищай благочестие;
радуйся, мечу, посецай злочестие.
Радуйся, учителю Божественных велений;
радуйся, губителю богопротивных учений.
Радуйся, лествице, Богом утвержденная, еюже восходим к небеси;
радуйся, покрове, Богом зданный, имже покрываются мнози.
Радуйся, немудрых умудривый твоими словесы;
радуйся, ленивых подвигнувый твоими нравы.
Радуйся, светлости заповедей Божиих неугасимая;
радуйся, луче оправданий Господних пресветлая.
Радуйся, яко учением твоим сокрушаются еретические главы;
радуйся, яко тобою вернии сподобляются славы.
Радуйся, Николае, великий Чудотворче.

Кондак 10

Спасти хотя душу, плоть твою духови покорил еси воистинну, отче наш Николае, молчаньми бо
прежде и бореньми с помыслы, деянию богомыслие приложил еси, богомыслием же разум
совершен стяжал еси, имже дерзновенно с Богом и Ангелы беседовал еси, всегда вопиющи:
Аллилуия.

Икос 10

Стена еси похваляющим, преблаженне, чудеса твоя и всем к заступлению твоему
прибегающим; темже и нас, в добродетели убогих, от нищеты, напасти, недугов и нужд
различных свобождай, вопиющих ти с любовию таковая:
Радуйся, от убожества вечнаго изымаяй;
радуйся, богатство нетленное подаваяй.
Радуйся, брашно негиблющее алчущим правды;
радуйся, питие неисчерпаемое жаждущим жизни.
Радуйся, от мятеха и брани соблюдаяй;
радуйся, от уз и пленения свободждаяй.
Радуйся, преславный в бедах заступниче;
радуйся, превеликий в напастех защитниче.
Радуйся, многих от погибели исхитивый;

радуйся, безчисленных неврежденно сохранивый.
Радуйся, яко тобою лютыя смерти грешни избегают;
радуйся, яко тобою жизнь вечную кающимся получают.
Радуйся, Николае, великий Чудотворче.

Кондак 11

Пение Пресвятей Троице паче иных принесл еси, преблаженне Николае, умом, словом и делом: многим бо испытанием правоверная повеления уяснил еси, верою, надеждою и любовию наставляя нас в Троице Единому Богу воспевати: Аллилуия.

Икос 11

Светозарную лучу во мраце жития сущим неугасимую видим тя, Богом избранне отче Николае: с невещественными бо ангельскими светы беседуеши о несозданном Троическом Свете, верных же души просвещаеши, вопиющих ти таковая:
Радуйся, озарение Трисолнечнаго Света;
радуйся, деннице незаходимаго Солнца.
Радуйся, свеще, Божественным пламенем возженнная;
радуйся, яко угасил еси бесовский пламень нечестия.
Радуйся, светлое правоверия проповедание;
радуйся, доброзначное света евангельского сияние.
Радуйся, молние, ереси пожигающая;
радуйся, громе, устрашающий соблазняющая.
Радуйся, истинного научителю разума;
радуйся, таинственного изъявителю ума.
Радуйся, яко тобою попрася поклонение твари;
радуйся, яко тобою научихомся поклоняться Творцу в Троице.
Радуйся, Николае, великий Чудотворче.

Кондак 12

Благодать, данную ти от Бога, сведущии, радующиеся твою память празднуем по долгу, преславный отче Николае, и к чудному заступлению твоему вседушно притекаем; преславных же твоих деяний, яко песка морского и множества звездного исчести не могуще, недоумением объяти бывше, вопием к Богу: Аллилуия.

Икос 12

Поюще твоя чудеса, восхваляем тя, всехвальне Николае: в тебе бо Бог, в Троице прославляемый, дивно прославися. Но аще и попремногу составленныя от души псалмы и песни приносим ти, Чудотворче святый, ничто же творим равно дарованию чудес твоих, имже удивляющиеся, вопием к тебе таковая:
Радуйся, Царя царствующих и Господа господствующих служителю;
радуйся, служителей Его небесных сожителю.
Радуйся, людем верным поможение;
радуйся, рода христианского возвышение.
Радуйся, победы тезоименитый; радуйся, венценосче нарочитый.
Радуйся, всех добродетелей зерцало;
радуйся, всех притекающих к тебе крепкое забрало.

Радуйся, по Бозе и Богородице все наше упование;
радуйся, телес наших здравие и душ спасение.
Радуйся, яко тобою от вечных смерти свобождаемся;
радуйся, яко тобою безконечные жизни сподобляемся.
Радуйся, Николае, великий Чудотворче.

Кондак 13

О пресвятый и пречудный отче Николае, утешение всех скорбящих, нынешнее наше приими
приношение и от геенны избавитися нам Господа умоли богоприятным твоим ходатайством, да
с тобою воспеваем: Аллилуия.

(Этот кондак читается трижды, затем 1-й икос и 1-й кондак)

МОЛИТВА

О всесвятый Николае, угодниче преизрядный Господень, теплый наш заступниче, и везде в
скорбех скорый помоющи! Помози ми, грешному и унылому, в настоящем сем житии, умоли
Господа Бога даровати ми оставление всех моих грехов, елико согреших от юности моей, во
всем житии моем, делом, словом, помышлением и всеми моими чувства; и во исходе души
моей помози ми, окаянному, умоли Господа Бога, всея твари Содетеля, избавити мя воздушных
мытарств и вечного мучения, да всегда прославляю Отца и Сына и Святаго Духа и твое
милостивное представительство, ныне и присно и во веки веков. Аминь.